

**Канон Святому и Великому чудотворцу Николу, певаемыи в напастех  
и зело скорбных обстоянии**

**Тропарь, глас 4-и.**

Правило вере, и образ кротости, воздержанию учителя, яви ты Господь стаду Своему, яже вещем истина; сего ради стяжав смирением высокая, нищетою богатая. Отче наш святителю Николае, моли Христа Бога, спаси души наши (дважды).

**Слава, и ныне, богородичен.** Иже от века утаенное, и ангелом несведомое таинство, Тобою Богородице земным явися Бог, в неразмене снятии воплощаем, и Крест волею нас ради восприим, им же воскресив первозданного, и спасе от смерти души наша.

**Канон, глас 5-и. Песнь 1, ирмос.**

Величаваго Фараона в мори потопивша со оружием и всадники, Израиля же преславно спасша, и по суху проведша, поем Христа, яко прославися.

**Запев:** Святителю Христов Николае, моли Бога о нас (поклон).

Имуще ты предстателя к Щедрому, иже напастми и печальми одержимии, к тебе прибегаем. Даруй руку, спасающую нас от всякия тесноты, ты бо стрелы лукаваго притупил еси преподобие, противлением божественных ти трудов; но твоими молитвами мудре, от того злодействия соблюди невреждены, тебе воспевающая, великии Николае.

**Запев.** Сокруши вражия козни, видимыя и невидимым Николае, всегда борющия мя враги в безконечную пагубу послы, и мене от недуг и соблазн житейских, напастей же и скорбей избави, иже молитвеника ты стяжавших ко Господу. Отверзающиеся на мя уста лукавая заградь, видимых враг и невидимых, да избавлюся твоими святе молитвами.

**Слава.** Избави мя мирских соблазн, и от бесовскаго озлобления, языческаго пленения, и всех человек лукавых вреждения. Успи злобу враждующих на мя, да ты яко избавителя нашего восхваляем.

**И ныне, богородичен.** Дево едина Чистая, Обрадованная, помози ми, присно обуреваемому житейскими напастми, и отчаемаго от множества беззаконии, спасению мя сподоби, Яже падения Адамова исправи, тако же воздвигни и мене, падшаго в злобный ров, молитвами Твоими Дево, и божественнаго Николы.

**Катавасия.** Избави от бед рабы своя, святителю Христов Николае, яко вси по Бозе к тебе прибегаем, скорому помощнику и теплomu заступнику, и молебнику ко Спасу о душах наших (поклон).

Господи, помилуй (трижды, с поклонами).

**Песнь 3, ирмос.**

Колблемое сердце мое Господи, волнами житейскими, утверди; во пристанище тихое наставляя, яко Бог.

**Запев.** Якоже древле юзники избавил еси от смерти, тако и мене избави искушении житейских. Ибо в пучине лютых плавающей, волнами

всеблаженне, обносим есмь. Руку ми ныне подательную помощи подаждь, отче Николае: от враг видимых же и невидимых избави мя.

**Запев.** О вселенней принося моления: от всякия нужды и скорбей безчисленных, спаси мя. Ты бо связанных неизбежно из темницы избавил еси, и узы растерзав зол моих, молитвами си, примири Божови, святе Николае.

**Слава.** Советы отче, подвизаемыя присно на мя ненаказанных человек, твоими молитвами, бездельны сотвори, и недуги души моея утиши; уста отверзающиеся все на любящих тя, пастырю, заградй. Вем бо, иже призывавыи тя в скорбех, и скоро обрящет утешение. Тем же ти ся молю: вся болезни моя, Николо, облегчи.

**И ныне, богородичен.** Уврачуи Всенепорочная, неисцельно болящую окаянную душу мою житейскими лестми, и многим грехом привержену. Яко Свет рождашая, просвети душу мою, омраченную страстми, и молися с Николою мудрым: от всякаго греха, всякаго вреда, и всякия злобы вражия, и злых человек, избавити мя.

**Катавасия.**

**Седален, глас 8-и.**

Яко ревнителя тя божественаго, и помощника по всему тебе призывающим тепле, во всем мире блаженне, Творец велика показа; аз же сокрушенным сердцем вопию ти, отче: утешение ми буди в скорбех, печаль разгоняя всегда от души моея, внезапно находящая на мя искушения многообразных, за множество моих согрешении. Не остави мене блаженне, без заступления, но простри ми, яко милостив, помощи руку и спаси мя вельми бедствующаго, бесовскими лукавыми наветы, и тлетворных человек. Яко да тишину получиивше, восхваляю тя, священнотайнниче Николае.

**Слава.** Колелбующееся бесовскими искушениями, и от обидящих человек, сердце мое утиши; и успи твоими неусыпающими молитвами, яже на мя востающия напасти: ты бо в ночи и во дни заступника нарицаю; молю тя: молитвы моя принеси Господеву, и сохраняя мя присно, святе Николае.

**И ныне, богородичен.** Во искушения многоплетенная впад, от враг видимых и невидимых, и бурю безчисленных ми грехов одержим есмь, Пречистая. Напастми жития сокрушися крепость моя, да яко к теплomu заступлению и покрову, ко пристанищу моему, притекаю Твоея благодости. Тем же Пречистая, из Тебе Воплотившагося без семени, моли о всех рабах Твоих, непрестанно поющих Тя, Богородице Пречистая, молящи Того прилежно: согрешении оставление даровати, поклоняющимся верою Рождеству Твоему (поклон).

**Песнь 4, ирмос.**

Божественное Твое разумев смотрение, дивяся Аввакум, Христе, трепетно вопияше: на спасение людем Си, спасти благия Своя пришел еси.

**Запев.** Якоже благодать прием исцелением, всеблаженне Николае. Души моея язвы молитвами си исцели, и находящих искушении избави мя, крепкою твоею молитвою, всеразслабленную душу мою прегрешении и жития злостью. Спаси мя твоими мольбами, предивне святителю.

**Запев.** Преиспещрен Божественною благодатию, святителю отче, от различных искушении и бед, спаси прибегающия в кров твой присно, ты бо первосвященником удобрение, благоухание Божественнаго Духа, Николае мудре. Миротворными ти молитвами, злосмрадныя страсти отжени от сердца моего, молюся.

**Слава.** Яко всех повелении Божиих исполнитель, течение свое скончав преподобно, о Христе пути моя исправи, яже к Нему, отче богосе Николае, и соблюди поспеши нам, иже на земли законоположения ко спасению ведущия. И избави мя от напастей находящихся, яко да убежав беспутнаго блужения, и ко спасенному достигну совершению.

**И ныне, богородичен.** Избави мя от всех напастей и от многих соблазнов змиевых, и от вечнаго огня и тмы, Всенепорочная. Разумев бо пророк Духом Божиим, гору Тя приосенную преднаписав Чистая. Иставшия зноем многих прегрешении, прохладя ходатайством Си, Дево. Единая человеком исправление. **Катавасия.**

#### **Песнь 5, ирмос.**

Окаянную душу мою, в ночи борющуюся со тмою страстей, предварив Христе, ущедри, и возсияй во мне. Солнце мысленное, дне светлыя лучи, да озарит мя по ночи свет.

**Запев.** Мольбу ныне сотвори отче, о рабе твоём, яко да оставление согрешением приму, и от одержания скорби да избавлюся, и всякия тесноты свободюся. Тебе бо молю Николае, благо ходатая ко Господу: не остави мя без заступления, но обычною си молитвою спаси мя.

**Запев.** Рачительною молитвою си мудре, сердца моего направи стези хранительно, на камени Божиих заповедей пресветлых. Спаси от коварств пакостных, и разрешение многих грехов моих испроси, сетей житейских и нужных, и искушении всяческих находящихся. Священне Николае, всем верным заступниче, и святителем основание.

**Слава.** Вкусив преподобие божественныя сладости, горесть возненавидел еси страстей и сластей, от них же мя избави, моля Христа, и востающия беды утоли. Ты бо столп непоколебим, и утверждение верным: присно мя колеблема житейскими злобами, и бесовскими духовениями, укрепил, всеблаженне Николае, молитвами си.

**И ныне, богородичен.** Уврачуи Пречистая страсти сердца моего, рождающая всех Врача, и праведных части яви мя причастника; омраченнаго мя всеми прилоги лукаваго, и во унынии живуща и прогневающего Бога, просвети Всенепорочная, и настави к добрым деланием, яко Вина сущи всем добрым. **Катавасия.**

## Песнь 6, ирмос.

Якоже пророка от зверя избавил еси Господи, и мене из глубины беззаконных страстей возведи, молюся, да приложу призрети ми к Церкви святей Твоей.

**Запев.** Яко Христова святителя, яко светозарную звезду, яко чудесем самотворца, яко источника исцелением, яко сущим в скорбех помощника, и яко избавителя теплейша в бедех отче, восхваляем тя, пастыря великаго, и подобника о всем, начальному Пастырю Христу, прилежно молим тя, Николае: от всяких искушении упаси рабы своя, и избавляй от всех житейских напастей всегда.

**Запев.** Стезю яже тамо ведущую, углади ми, преблаженне, житейских волн облегчи мя, и ко пристанищу жизни возведи. Глагол Божественных послушателю, услыши моя глаголы: избави мя от бесовских соблазн, и беззаконных мужей, и всяких обстоянии находящих, великии Николае.

**Слава.** Огня искушении на всяк день примешаюся, посреди сетей многих хожу, яко же птица; под твой щедрый покров притекаю, невредна мя сохрани, молитву мою услыши спешно, отче Николае, потщися приити ми на помощь обуреваемому скорбьми, и нуждами житейскими и бесовскими озлоблении, яко да спасаемь, пою предстательство твое.

**И ныне, богородичен.** Господородительнице Чистая, обладаема мя многими страстьми, яко Блага, представ избави от сих, яко да Тя воспеваю душею и сердцем и языком, спасаемь. **Катавасия.**

**Слава, и ныне. Кондак, глас 3-й, подобен: Девая днесь.**

**В** Мирех святе Николае, освящ себе житием совершенным, и явися святитель Бога вышняго, от него же укрепляем, еретичествующих уста заградил еси, и от бед люди избавив; тем же и мене, обуреваемого печальми житейскими, избави, нас бо ради показася чудотворец изыщен, предивен и милостив.

**Икос.**

**В**оспоем ныне святителя песнями, мирским людем пастыря и учителя, да молитвами его просветимся. Сей бо явися чист весь, нетленен духом, Христови принося жертву непорочну, чисту и благоприятну, яко святитель очищен душею и телом. И истинен Церкви предстатель и поборник, и чудотворец изыщен, предивен и милостив.

**Прокимен, глас 4-и:**

**С**вященницы Твой облекутся в правду, и преподобнии Твой возрадуются.

**Стих: В** церквах благословите Бога, Господа от источник израилев.

**Евангелие от Иоанна, зачало 36.**

**Р**ече Господь ко пришедшим к нему иудеом: аз есмь дверь, мною аще кто внидет, спасется; и внидет и изыдет, и пажить обрящет. тать не приходит, разве да украдет и убиет и погубит. аз приидох, да живот имут и лишше имут. аз есмь пастырь добрый; пастырь добрый душу

свою полагаёт за овца, а наёмник, иже несть пастырь, ему же не суть овца своя, видит волка грядуща, и оставляет овца и бегает. И волк расхитит их, и распудит овца. А наёмник бежит, яко наёмник есть, и не радит о овцах. Аз есмь Пастырь добрый, и знаю Моя, и знают Мя Моя; яко же знает Мя Отец, и Аз знаю Отца, и душу мою полагаю за овца. И ины овца имам, яже не суть от двора сего, и тыя Ми подобает привести, и глас Мой услышат; и будет едино стадо и Един Пастырь.

#### Стихера, глас 6-и.

Наследниче Божии, сопричастниче Христов, слуго Господень святе Николае, по имени твоему тако и житие твое: просия бо с седминами разум, свидетельствоваше светлость лица твоего, душевное незлобие; извествоваше кратость, слово молчаливое; жизнь твоя славна, и успение со святыми; моли о душах наших.

#### Песнь 7, ирмос.

Пламень пещныи поработиша благочестивии отроцы, тем свыше оброси я, готовы палимы по естеству; но паче естества мужески пояху: благословен еси Господи, на престоле славы царствия Твоего.

**Запев.** Священству правило, и кратости образ, вем ты мудре, на мя востоящую бурю, страстей и бед, укроти молитвами си. И соблюди мя неврежена; ты мою утеша, отче, душу невидимо, множеством озлобленную люте. Ты безмерная ми укроти искушения, яже лстывыи подвижет ми во дни и в ночи, благ мне предстатель являясь, священнейшии отче Николае.

**Запев.** Иже древле явлься во сне царю, неповинныя имущия умрети избавляя, напастей мя избави находящихся всегда, и от недуг телесных и душевных болезней; руку ми подаждь, к Божией помощи Николае. И сохрани от лютаго вражия чаяния, якоже и юноши иногда смерти горькия избавль, да почитаю тя, яко благого предстателя.

**Слава.** Пресветлаго светильника неугасимаго, на земли сущаго столпа, и ко пристанищу Божественному призывающа, иже волнами житейскими присно потопляемии, Николу вси почтем, и любовьию ублажим.

**И ныне, богородичен.** Воплощшееся Слово, премножеством благоутробия, неизреченно родила еси, Того моли Пречистая: плотския страсти и скверны всех избавити, и всех нужных жития.

**Катавасия.**

#### Песнь 8, ирмос.

Крепцыи отроцы трие суще, силою обolkшеся, тричисленныя, ловиша и победиша халдеи, и дивно изменися естество: како огонь росю прелагашеся. Без туги я сохрани, яко пленами, опролиявыи мудрость на всех делех Твоих, Боже; Тя превозносим во веки.

**Запев.** Воду живу в сердцах имьи благодать Господню, орошаеши присно мудре, иже зном скорбей и сухотою грехов бедствующих, окаянне погибнути имущих, всеблаженне. Иже избавлени ведомый на

смерть неправедно, тако же и мене ныне спаси от человек тлетворных стужения, и от всякия бесовския лести.

**Запев.** Землю коротких наследовал еси, короток преподобие быв, темже ти ся молю верно: укроти молитвами си подвизающиеся на мя присно лукаваго треволнения. Ты избавил еси и воеводы, иже неправедно умрети хотящия, тако от человек лукавых озлобления мя избави, и от всякаго бесовскаго навета, Николае, свободи, моля Спаса.

**Слава.** Силою Божиею всеблаженне укрепляемь, ревность благочестия по разуму стяжал еси. Темже хотящия неправедно умрети избавил еси, сего ради ты молю: моление Господеви отче, неоскудно приноси ты, яко да грехов и пламене мучения вечнующаго, и напастей и скорбей избавит мя, яко един Преплагий.

**И ныне, богородичен.** Неусыпающую Чистая, имущи молитву, успи моя страсти, телесныя и душевныя, священными ходатайствы Твоими. Божественную и спасеную дающи бодрость, Иже вселивися во утробу Твою Слово, Мати Чистая, и иже древле в человецех всельшуюся от преступления тлю, яко Бог, Един вне изгнал есть, за милосердие милости. **Катавасия.**

#### Песнь 9, ирмос.

Величаем, Христэ, Твою всенепорочную Матерь Чистую, яко роди Тя, паче естества, плотию всех Зиждителя, всякаго вреда и тли нас избавляюща.

**Запев (поклон).** Безпечальную жизнь наследовав отче, и радости духовный исполняем присно, всяку печаль отжени, молюся, от души моея; в житий тленном ныне, напастей всяких наполняемь, пучину присно преплавая, да обрящу ты преподобие окормителя, в тишину прелагающа бую, священнейшии отче Николае.

Неправедно ведомыя на смерть избавил еси, ревностию Божественною отче, священнолэпно разгараяся, темже вопию ти: тако же изми и мене от напастей, умерщвляющих лэте; ты бо посреде ко всем призывающим ты приходиши, облегчая болезни душ наших, и утешение боголэпно подавая.

**Запев.** Священне отче, услыши мя в день наведения бед и скорбей, и всякую тесноту отгоня, благодатию иже в тебе живущаго Духа. Аз, сокровенную страстьми житейскими, душу мою имьи, на помощь ты призываю, священне Николае: потщися и даждь ми совершенное исцеление, победителя мя покажи молитвами си, страстем раждающим смерть, и беззаконных человек языка лстыва; иже верою ты присно блажащих.

**Слава.** Мучения иже в геене, и от лукавых человек стужения вреднейшаго избави мя, священными молитвами си преславне. Иже древле умрети неправедно имущия воеводы, избавишася твоими молитвами; яко же тем помощь твою спасительную низпослав, тако же низпосли и мне, чудотворче Николае, в день беды; от житейских

напáстей и лукавых человек искушэнии, люте обуреваемого всегда, исхити всякаго вреда, достоблаженне.

**И ныне, богородичен.** Людие твой и град молят Тя, Матерь Божию: изми нас от всякия беды, Всечистая Владычице; и мене иже небрежением души омрачившаго, и в клеветы злых человек падшаго, просвети и избави Чистая, яже Свет рождающая, и сердца моего возжизняющая свещник, яко да усердием благим славу Тя. **Катавасия.**  
**Задостойник:** Владычице, прими молитву раб Своих (поклон земной).  
**Трисвятое, и по Отче наш.** **Молитва Исусова.** **Тропарь:** Правило веры.  
**Слава, кондак:** В Мирех святе Николае. **И ныне, богородичен:** Иже от века утаенное. Господи помилуй(40, с поклонами). **Слава, и ныне.**  
**Таже, молитва.**

**Запев:** Святителю Христов Николае, моли Бога о нас (поклон).

**О!** Освященная главо Николае, иже имьи апостольская дарования, покажи ныне и на нас, нищих и смиренных рабах твоих, свое отеческое благоутробие. Отжени от нас вся вещи неприятны, и всякия прилоги страстей, и соблюди своея паствы, еже есть верных сочетание: вся, иже во власти сущия и все Христолюбивое воинство, освященный чин, и вся люди верныя, еже на пажити благочестивых недр, злаго твоего соблюдения, да питаеми будем всегда, и светлостью облистаети твоего заступления, невредены пребудем, в тишине же и в любви и во смирении проживем честно, еже и святое блаженство твое, присно величающе, ублажим же и прославим, сие рцем: блажим тя Мире, иже Ликийския страны граде, яко такова пастыря и великомудра учителя получил еси, яко Христову непреборима воина, иже еретическия полки Божиим словом всеильным, яко копием остротою разума прободая, и вся тех лестныя козни низлагая. Блажим блаженного, иже родившаго тя, и воспитавшаго, яко велик дар Богу принесе, воистину паче всякаго всеплодия; не токмо же Ликийстей стране похвала ты еси, Николае, но и всей вселенней предивное удобрение, велик бо еси в чудесах, еже и святым священнейшее радование. Тем и ныне вернии, сошедшеся во святую Церковь, молим тя и вопием: **О!** отче святыи Николае, призри на люди верныя, и направи нас мольбами твоими, еже избавитися бесовскаго навета. И благоприятным Богу быти, Благодатию Того и человеколюбием, Искупляшаго нас честною животворящею из ребр истекшею Кровию, Христа Бога нашего, Ему же подобает всяка слава, честь и держава и великолепие, со Отцем и со Святым Духом, ныне и присно и во веки веком. **Аминь(поклон земной).**

**Посем:** Честнейшую херувим. **Слава, и ныне.** Господи, помилуй (дважды), Господи, благослови (с поклонами).

**Отпуст:** Господи, Исусе Христе, Сыне Божии, молитв ради Пречистыя Ти Матере, и иже во святых отца нашего Николы, архиепископа Мир Ликийских чудотворца, и всех святых, помилуй и спаси нас, яко Благ и Человеколюбец. **Аминь.**

Господи помилуй (трижды), и обычные исходные поклоны.